

39.

# MEMORIAM REFORMATIONIS,

IN ECCLESIA RIGENSI,

ANNO M DXXII.

exeunte Octobri,

IN PETRINO PRIMUM TEMPLO

susceptæ,

pro Disputationis exercitio,

PRÆSIDE

M. JOHANNE BREVERO,

Pastore, Professore & Insp.

proponit

BRUNO HANENFELD,  
RIGENSIS.

D. 11 Novembr. loco & horis usitatis.

RIGÆ,

Typis BESSEMESSERIANIS,  
ANNO MDC LXXX.



R ESTICA

A. 2853.

VIRIS  
Magnificis, Nobilissimis, Amplissimis, Consultissimis  
& Prudentissimis,  
**DNO BURGGRAVIO**  
REGIO,  
**DNIS CONSVLIBVS,**

TOTIQE  
ORDINI SENATORIO

ESTICA

A. 2853.

TRD Raamatukogu

INCLUTÆ  
LIVONIÆ METROPOLEOS

R I G Æ,

4438 SUMMIS MUSARUM MÆCENATIBUS,  
EVERGETIS ac PROMOTORIBUS SUIS  
singulari observantiae cultu ævum  
venerandis,

Primum hoc γυμνάσιο Theologici specimen, in  
sempiternum deditæ mentis testimonium, eâ,  
quâ par est, devotione, cum omnigenæ felicita-  
tis voto, officiosissime

offert & consecrat

BRUNO HANENFELD.

CUM DEO!

ASSERTIO I.

**R**eformationis in Ecclesia militante studium insigne  
gratiae divinae beneficium est.

EXPLICATIO.

I.

**A**gendum nobis in præsentide Ecclesia, & quidem (1.) militante, officia salutis nostræ ordinaria, in qua membra ejus, sub vexillo Christi, ducis sui atque capitis, adversus hostes suos, in hoc mundo, militant, *I. Timoth. I, 18*, donec, superatis per divinam gratiam Satanâ, mundo & peccato, ex regno gratiæ in regnum gloriæ transferantur. De triumfante enim minus hic sumus solliciti: futuram vitam ea respicit, in qua, militiâ suâ defuncti, devictisque hostibus, cum Salvatore suo æternum triumphant, quotquot ἐπινίκιον Apostolicum ingeminare possunt, *II. Tim. IV, 7*. Agendum nobis de Ecclesia (2.) vocatorum, hoc est, cœtu hominum, à Christo, per prædicationem Evangelii & administrationem Sacramentorum, ex universo mundo evocatorum & congregatorum ad Regnum Dei, in quo cœtu sunt electi ad prænitionem Dei, h. e. verè ad finem usque credentes: quibus mixti sunt non sancti; sed tamen in professione fidei consentientes: quæ Definitio Ecclesiam N. T. potissimum spectans, ex A. C. à B. Mentzero petita est. Et hanc quidem Ecclesiam, si ut totum aliquod consideramus, Ecclesia universalis s. universa: si in suis partibus, particularis dicitur. Quid enim universalis est, nisi Ecclesiæ particu-

A 2

particu-

particulares conjunctim sumtæ, sub uno Capite? Sicut plures *personæ* unam faciunt familiam: plures *familia* unam civitatem: plures *civitates* unum *regnum*: ita plures illius cœtūs *personæ* unam faciunt Ecclesiam *domesticam*: plures *domesticæ* unam *parochialem*: plures *parochiales* unam *Diœcesanam*: plures *Diœcesanæ*, *Provincialem* aut *Nationalem*: plures tales unam *Catholicam*, adeoque plurimæ particulares, per universum collectæ, in unum corpus coalescunt. Corpus hoc mysticum est, nempe Christi, *Eph.* IV, 11, seqq. membra ejus vera soli sunt credentes, quam diu tales sunt, soli enim habent Christi Spiritum, *Rom.* VIII, 9, *Gal.* II, 20. soli eandem ex eo vitam, eundem sensum & motum accipiunt, soli unâ fide, spe & caritate constringuntur, *Eph.* IV, 3 seqq. alii autem non credentes, et si in externa hujus Ecclesiæ societate versentur, membra tamen vera non sunt, & huc ea, quæ *Joh.* XV, 4. 5. 6. de palmitibus dicuntur, juxta alias Christi parabolas, referri possunt.

II. Quam illustres aliâs Ecclesiæ tribuantur tituli, non est opus, ex DD. nostris huic arcessere. Satis luculentiter eos proposuit exposuitque B. Gerhardus Noster, *Loco de Ecclesia*: neque tamen ullus est, qui eam ab erroribus immunem prorsus statuat. Errant certè plurimum, qui militantem Ecclesiam errare posse pernegant. Expendatur enim (1.) *illius conditio*: militans est, & eo ipso etiam à triumfante, extra omnē deformationis & erroris metum constituta, differt. Ex parte enim in hac vita cognoscimus, & ex parte prophetamus, *1. Cor.* XIII, 9. & sicut caro concupiscit adversus Spiritum, *Gal.* V, 17. & lex membrorum adversatur legi mentis nostræ, *Rom.* VII, 23, ita quoque Sapientia carnis, quæ adhæret nobis, est inimi-

niticia adversus Deum, *Rom.* VIII, 7. ut in errores labi facile possumus. Et quid tam solicite Ecclesiam præmoneret Spiritus Sanctus, ut sibi à defectione ac seductione, & ab erroribus caveat, si nullum ei imminaret à talibus periculum? Expendatur (2.) *illius deformatio*, quæ ex malis istis suboriri potest, & quidem a ratione Ecclesiæ universalis: quanquam enim illa, vi *promissionum divinarum*, neque penitus desicere, neque fundamentalibus erroribus felicitate suâ excidere queat: tamen, cum, ingruitum hæresium & persecutionum tempore, quandoque ita obscuretur, ut nullus uspiam illustris cœtus, sincero verbi divini exercitio addictus, in conspectum veniat, ut, prævalentibus in ea malis, ministerium publicum erroris doctrinis corrumpatur, *deformationi* eam esse etiam obnoxiam, negari nequit. Tempora sanè Christi patientis & resurgentis; *Tyrannica* sævitiae, Christiano nomini interitum machinant; *Arianæ* hæreseos orbem inundantis; *Anti-Christi* dominantis, manifestum tanti mali indicium præbere certum est. Fixum aliâs firmumq; manet *Salvatoris αὐτοῦ πρεσβύτης*, quod portæ inferorum adversus eam non sint prævalituræ, *Matth.* XVI, 18. manet nomen ejus splendidissimum, quod sit columna & firmamentum veritatis, *I. Tim.* III, 15. Erit enim Christus, cum veris Ecclesiæ suæ membris, usque ad consummationem seculi, *Matth.* XXVIII, 20. Sed expendatur illa Deformatio in primis B. ratione Ecclesiæ particularium: quot & quam tristia illarum exempla historiæ, non modò Biblicæ; sed etiam Ecclesiasticæ, nobis suppeditant, quæ honorem nominis divini non uno nomine perdiderunt? Factum enim hoc est (a) omnimodâ defectione: videmus & dolemus istud in Ecclesiis pluribus, quas ipsi fundârunt Apostoli

stoli, à quibus Christus regnum suum planè abstulit. (β) ministerii externi corruptione, quod non Israeliticæ Judæo-que tantum in Veteri; sed Christianæ etiam in Novo Testamento Ecclesiæ suffragio suo testantur. Memorable est, quod Eusebius, l. III, Histor. cap. 32. refert, ab Apostolorum scilicet è vivis excessu, Ecclesiæ non diu manasse virginem; sed mirum in modum corruptam fuisse, doctrinâ falsâ & commentitiâ, nudo, ut ajunt, capite, sincero veritatis sermoni se ex adverso opponere ausâ.

III. Quantum verò malum, malum certè cum periculo æternæ salutis conjunctum, hæc *Reformatio*: tantum gratiæ divinæ beneficium est *Reformatio* Ecclesiæ; sed ex præscripto Salvatoris nostri suscipienda. Notari enim debet (I.) *Reformationis* ejusmodi *diversitas*: alia est *existialis*, modò violentâ manu, modò fraudulentis machinationibus mutationem instituens: alia *medicinalis*, optatissimam Ecclesiæ incommodis medelam præstans, sive *ordinariæ*, quæ statis temporibus peragit, quò Visitationes Synodiique, & adminicula alia referuntur: sive *extraordinariæ* & solenniter, qualem quidem & ab ipso Christo circa N. T. initium, &, circa mundi finem, per B. Luthерum factam, Thesi nostrâ innuimus. Et hæc medicinalis *Reformatio* nihil est aliud, quam prioris formæ, per abusus & errores magis aut minus corruptæ accurata restitutio, & cum divini verbi regula conformatio, ut omnia meliori cultu & vultu, ad nominis divini gloriam, & Ecclesiæ salutem apparent. Sicut enim membra in humano corpore, dum sanitate adhuc commodâ fruuntur, adsufescere solemus, ut unumquodvis faciat officium; luxata autem ubi deprehendimus, curatè reponimus in suum locum, ut pristinum corpori nostro decus & robur redatur:

datur: pari ratione in corpore Christi mystico videndum est, ut membra ejus valida non Deo tantum; sed & proximo inserviant: si verò vel humano quodam lapsu, vel Doctrinæ corruptelis, vel morum pravitate graviter luxata fuerint, adhibitâ, per Dei gratiam, instauratione vires recuperent. Ideò notari quoque debet (2.) *Reformatio*-nis *qualitas*, quæ, ut pro objectorum varietate singularem curam exigit: ita à B. Balduino, in Præf. Comment. super Epistolam ad Corinthios, (quam *Reformationem Apostolicam* nominat,) studio labore repræsentata est. Dedicavit eam Amplissimo Civitatis Rigenſis Senatui, factâ etiam *Reformationis Knopiana* mentione; quid obstat, quin & nos, memoriam illius repetentes, B. Balduini mentem manumque secuti, concisiùs nonnulla exinde proponamus? Cum ergò tria sint potissimum, quæ faciem Ecclesiæ vel plurimum deformant, vel labe aliquâ adspergunt: errores in doctrina, lapsus in vita, novitates in ritibus Ecclesiasticis: a. frustraneum est, vel statim Syndicos urgere, & Concilia, vel connivere, ut lenitate nostrâ abutantur impii, aut armatam rituum extirpationem suscipere: aliena hæc fuerunt ab instituto Apostolico: quod quidem ut sequamur, B. necessarium est, (a) doctrinæ Christianæ corruptelas, candidè recensitas, & nonnisi probè perspectas, solidis argumentis refutare: (β) corruptos mores justâ gravitate non modò castigare; sed etiam in refractarios disciplinâ Ecclesiastica animadvertere: (γ) de Ceremoniis rectè placideque omnes instruere, ut ita omnia ordine & decenter in Ecclesia fieri intelligent. Ita *Reformationis* studium in Corinthiaca Ecclesia suscepit Apostolus: quod si eadem curâ & prudentiâ in aliis quoque

que fiat, quis non utroque laudet pollice, & ceu illustre gratia divinae beneficium, commendandum esse afferat?

## ASSERTIO II.

In Rigenſi etiam Ecclesia Reformatio superiori seculo fuit necessaria.

## EXPLICATIO.

I. Hanc enim Ecclesiam primō locō ponimus, *Mātrem* reliquorum per Livoniam cōtūm, qui Salvatori suo, *ministerio illius*, acceſſerunt. Sicut enim arbores illae matres dici solent, ex quibus præcisi ſurculi vel aliis inoculantur arboribus, vel in ſcrobe tantū seruntur: ita nomen iſtuc Rigenſi etiam Ecclesiæ per analogiam haud incommode tribuitur, cum & Christiana Religio ſedē ſuam, aliquot abhinc ſeculis, prope Dunam noſtrum, fixerit, & Reformatio hoc ipſo Octobr. mense, anno MD XXII. Rigē publicē fecerit initium. Ut autem (1.) de natalitiis Christianitatis referamus aliquid, (nec enim pluribus hoc agere instituti noſtri eſt,) ſatis conſtat ex Historicis, Bremensē radio doctrinæ Christianæ noſtram iſtrāſſe Livoniam: tempus notant verſūs iſti:

Christum Livonibus Meinardus predicit, Anno  
Milleno centeno, nongeno quog, quarto.

Bremensibus autem primam lucem intuliffe Carolum M. nullō fine aliō, quam ut à tristi idolorum Ethnicorum cultu liberatos, sanctissimo Dei verbo ad veram fidem converteret. Quam laudabilis enim incomparabilis Herois conatus iſte fuerit, que Fides ejus & Religio, B. Höpfnerus, in Saxonia Evangelica, p. 385. ſeqq. ſatis fuſe monſtravit. Sed veniamus (2.) ad iſtum Ecclesię Rigenſis ſtatutum, qualis ad tempora Reformationis uſque fuit:

cor-

corruptissimus ſine dubio fuit, flagrante paſſim *superſitione* in ceremoniis, *idolomania* in cultu, errore in dogmatibus, *tyrannide* in Politia, Romanis Pontificibus ad perniciem doctrinę Christianę dominantibus: neque enim alia, tempeſtate illā, inprimis per Eccleſiam Occidentalem, ejus fuit facies Confessi ſunt hocipſum non tantū ante B. Lutheri tempora; ſed poſt illa etiam, magni Viri in Romana viventes Eccleſia: ipſe veritatis meridies cuivis facilē aperuit Apoſtasiā triftiſimam, qua& & in diſformitate ab Eccleſia Apoſtolica, & in conformitate cum iis, qui à Christiana Fide alieni ſunt, exactē ſatis depreheſditur. Conferantur modò ex noſtris B. Nic. Hunnius, de Apoſtasia R. Eccleſiae, ex propria ipſius Conf. demonſtrata: B. Gerhardus, l. 1. Confess Cathol. inprimis part. 1. cap. 4. omnia ab ipſis tantō ſtudiō probata animadvertuuntur, ut adverſarii, aliās loquacissimi, in Angeronæ templum ſeſe ſubduentes, ad hunc uſque diem Sigalioni ſacra ibi faciant. Quod ſi quæras a. de illo malo; unde fuerit? ita enim quærere licebit cum ſervis, in parabola, Matth. XIII, 27. paratum eſt v. 28. reſponſum Patris familiās: à malo, Eccleſiae Christianae hoſte pertinacissimo. Dum enim dormirent homines, venit nequam, & ſevit Zizania inter triticum, v. 25. Quid autem eo tempore Christus, caput ſuæ Eccleſiae? num & ipſe dormivit, ut, abjectā clave, aliquot ſecula ſurſum & deorſum ferrentur omnia? Ita quidem ſtatuit Baronius, qui fata ſeculi noni, ad Ann. 912, n. 8. deſcribens: dormiebat tunc Christus, inquit, planè alto, ut apparet, ſopore in navi, cum hiſce flantibus validis ventis navis ipſa fluctibus operiebatur. Dormiebat, inquam, qui iſta non videre diſsimulans, ſineret ſic fieri, dum non exurgeter vindex. Et, quod deterius videba-

B

tur,

tur, deerant, qui Dominum dormientem clamoribus excitarent discipuli, STERTENTIBUS OMNIBUS. Hæc columen Ecclesiæ Romanæ, *Cardinalis!* cui fidem facile habemus, omnium, quos vigilare oportebat maximè, ronichos deploranti, ut tamen de Salvatore nostro longè statuamus aliter. Non dormiebat ille; sed in conservandis suis vigilabat constanter, ne, cum reliqua errantium multitudine, in abyssum agerentur præcipites. Quod si autem quæras *B.* de illius mali incremento, quoniam vel autore, vel tempore, vel ordine tantas vires, usque ad tempus Reformationis, sumserit? ad historicam pertinet accuratiùs hoc discutere: ad officium fidei aut salutis parum facit. Propagata & stabilita est deformatio in Ecclesia non statim; sed paulatim: non repente; sed lentè; non uno sive deformatore, sive tempore; sed plurimis & distinctis. Ex historiis quidem non pauca *de mysterii* istius operatione, ut *H. Theff. II. 7.* dicitur, collegerunt Viri docti; sed quot libros huc facientes combusserunt Romanenses, ex quibus plura licuisset cognoscere? quot depravârunt liberatos ab incendio? oculariter hoc probant *Indices Expurgatorii* & acta ipsa. Habet sanè omnis iniquitas incrementa sua: radix sàpe in occulto est, emergit virga, crescit nobis non advertentibus, floret tandem atque germinat. Ita etiam de invectarum corruptelarum incremento judicandum est, docente Magistro veritatis, *Matth. XIII. 24 & seqq.*

II. Periculosa nimium est hæc Assertio, *inquires:* omnibus ante Reformationem majoribus nostris salutem, si non planè adimit; reddit tamen planè dubiam. Quid enim? si tam deformis fuit *Ecclesia Rigenis* status, (1) quâ conscientiâ manserunt in ea majores nostri, neglectâ

glectâ cœlitùs delapsâ voce? *Apoc. XIX. 4* quâ spe Salutis obtinendæ niti potuerunt miseri, cum nulla agnoscendæ veritatis haberent media? Non enim, nisi *Papistarum* idolomania atque dogmata, cum præsentissimo animarum periculo proposita illis fuerunt. Ita surgunt in nos adversarii telo, ut sic dicam, dupli; sed sine nostro incommodo. Quod n. a. attinet divinitùs mandatum piis è Babylone exitum, obligati quidem fuissent relinquere Babylonem, si ad aliam Ecclesiam puram locus ipsis patuisset, aut *Papatum* Babylonem mysticam esse, satis habuissent cognitum: jam verò vel per ignorantiam Babylonis non satis cognitæ, vel per defectum aliis puræ Ecclesiæ à Pontificia, qualis tunc fuit, separare se non potuerunt, animò licet & affectu alienissimi. Superiori demum seculo, *B. Lutheri* operâ, mysterium iniquitatis plenè detectum est, ut, repurgatâ Christianâ doctrinâ, frustra obnitentibus persecutoribus, publicè & purè verbum Dei in Ecclesia docere, & Sacra menta ritè & rectè administrare liceret. Tum verò vox cœlestis ad pios maximè directa esse videtur. Sed annon fuerunt *Waldenses*, Confessores illi veritatis contra *Papatum*, ab anno 1160. constans? Fuerunt certè, imò etiam Germaniam in persecutionibus gravissimis transeuntes, in *Livonia* nostrâ larem fixerunt, quod *Thuanus* in *Præf. Hist. Tit. I. 15.* refert, id quod circa A. 1300, & ante etiam factum esse, ex *Catal. Test. Verit. Tom. II. lib. 15, p. 540.* potest colligi: neque repugnabimus, si quis ex Rigeni etiam Ecclesia fuisse statuat, qui purgatô mentis obtutu, cœlestis veritatis juubar adspexerunt clariùs; sed cum ullum hîc fuisse cœtum publicum non constet, nullum inde tutum evadendi medium *Majores* habuerunt. Neque nulla tamen fuerunt (3) *eo*

*eō statu veritatis agnoscendae media.* Non defuit (a.) *textuum Biblicorum & pericoparum Evangelicarum prælectio*, ut de mysteriis salutis, de S. Trinitate, de Persona, Officiis & beneficiis Salvatoris sui, aliisque utiliter informati, veram inde conciperent fidem. Fuerint conciones minùs frequentes, & satis frigidæ, ut meritò huc referas, quod de *Heli temporibus* dicitur, *I. Sam. III. 1*, non tamen fuerunt nullæ, accendentibus, in explicatione Scripturæ sacræ, in Monasteriis præsertim & Ecclesiis Collegiatis, Homiliis Patrum, quibus ad pietatis studium auditores informarentur. Non defuit (b.) propositæ doctrinæ cum fundamentis *Catecheticis collatio*. Mansit, sub crassissimis etiam tenebris, (a.) totus *Decalogus*, speculum illud clarissimum, ex quo peccata sua facile agnoscere, reatum pravæ concupiscentiæ observare, normam quoq; operum bonorum habere potuerunt. Mansit (b.) *Symbolum Apostolicum*, breviarium aliquod articulorum fidei, quibus lumen addidérunt historiæ sacræ de Christo, de effusione & donis Spiritus Sancti, de collectione Ecclesiæ & aliis. Mansit (c.) *Oratio Dominica*, exemplar veræ invocationis & Regula, quâ fidem suam Deo sistere & roborare datum illis fuit. Mansit (d.) *institutio Baptismi*, qui, cum janua sit ingressus in Ecclesiam Christi & salutem, in omni tentatione gratiæ federalis memoriam in piis renovare potuit. Mansit (e.) de *Sacra Cœna* informatio, saltem in præclaris, & adhuc hodie in Ecclesia usitatis hymnis; his sanè ipsis testati sunt majores omni tempore, jure sibi, & ex Christi institutione deberi quoque benedictum calicem, cuius usu non diu ante *Constantiense Concilium* privati fuere. Quis dubitet, in his omnibus Spiritum Sanctum fecisse, quod suum est, piorumque animos efficaci suâ operatione illustrâsse, ut pretiosum à

vili

vili discernerent, & graviora errorum pericula per Dei gratiam, superarent?

III. Sed ubi erat tunc (1.) *ministerium verbi divini & Sacramentorum*, cuius operâ Spirit. Sanctus in Ecclesia utitur? quotquot Rigæ docebant, vel seducebant potius populum, satellites erant Romanæ Curie, ad perniciem potius homines doctrinis suis, quam ad salutem ducentes, de qualibus Christus agit, *Matth. VII. 15. 18.* Nisi forsitan eosdem & Diaboli, & Dei ministros fuisse absurdè statuamus. Ubi erat (2.) *Sponsa Christi, mater fidelium*, in hac civitate, quæ liberos spirituales generaret Christo? Ita enim in visione proposita fuit Joh. *Apoc. XII.* nunquid adulteram (talem enim, *judicio Spiritus Sancti*, Pontificiam Ecclesiam fuisse, & adhuc esse, dicendum est,) sanctissimum opus hoc peregisse putemus, aut utroq; illam insigniemus titulo? Nam ista aliaque nobis absurditatum retia parare tentant talium artifices, sed sine veritatis detimento. Ut enim a. *de ministris verbi divini agamus*, fuerunt (a.) tales, quamdiu hic Ecclesia fuit: ipsum certè ministerium Spiritus Sancti, per verbum & Sacraenta, nunquam extinctum fuit, aut extinguetur: ad dispositionem & *ταξιδιον* divinam pertinet, ut sanctis illis *mediis* & constituantur Ecclesia, & conservetur. Sed utrum cum hac perpetuitate (b.) non modò idem semper splendor, & externa dignitas, sed eadem quoque, in docendo Dei verbo, in administrandis Sacramentis, apud ministros *puritas* vel fuerit, velesse soleat, de eo & scripturæ sacræ, & historiæ Ecclesiastice consulendæ sunt. *Negativam* utrinque audiems: corruptum sæpius, & sine splendore suo Ministerium nobis proponetur, manente tamen (γ.) *mediorum divinorum efficacia*, quæ non à ministri pietate aut impietate:

tate; sed ab instituentis Dei promissione & veritate de-  
pendet: *vitium & officium* in hominibus accuratis disser-  
ni limitibus debent. Qvam corruptus erat Ecclesiæ Ju-  
daicæ, ante adventum Christi, status? quales *Sacerdotes* Le-  
vitici? & tamen Deo filios & filias ab illis tunc fuisse ge-  
nitas, passim legitimus, *Ezech.* IX, 4. c. XVI, 20. c. XXIII, 4. &  
37. *Soph.* III, 12. Neque alia fuit Ecclesiæ Judaicæ, ad-  
ventante Christo, conditio: quales fuerint ministri ejus, pa-  
tet ex *Math.* XVI, 11. & locis aliis quamplurimis, & tamen,  
juxta pios Judæos, faciebant viros religiosos, *Act.* II, 5, 10.  
Neq; repugnat aliquem, *diverso respectu*, Dei & Diaboli in  
Ecclesia ministrum dici: Dei quidem, in quantum ejus  
verbum; Diaboli autem, in quantum falsas etiam doctrinas  
proponit. Quid enim? annon *Pharisei & Scribæ*, fermentum  
suum hominibus inculcantes, regnum cœlorum co-  
ram ipsis claudentes, filium gehennæ duplo magis, quam  
ipsi essent, facientes, *Matth.* XXIII, 13, 15. ministri erant Dia-  
boli? & tamen etiam Dei, cum in cathedra Mosis ea,  
quæ lex & Moses dicunt, proponentes, suos auditores,  
ut, quæcumque legi convenienter dixerint, servare jube-  
rent. Eò enim Christus ipse Discipulos quoque suos re-  
misit, *Matth.* XXIII, 1, 2. Neq; adversatur his, quod *Matth.*  
VII, 15, 18. proponit, Pseudoprophetas, quatenus tales  
sunt, malæ arbori, spinisque & tribulis similes dicens: *eo*  
*enim modo;* si, (*ut loquuntur,*) reduplicativè consideres, ad  
perniciem homines, non ad salutem ducunt, nihil boni  
proferunt: dum autem *verbum* Dei legunt, & docent pu-  
blicè, licet non sine vitiosis glossis, dum administrant *Sacra-  
menta*, & ita instrumenta Christi sunt, quis malas di-  
cat arbores, aut ad salutem homines ducere posse inficie-  
tur? Et hinc nobis facilis ad *β*, patet aditus de ipsa Ecclesiæ:  
eam

15163

eam hîc ante Lutheri quoque tempora fuisse; sed corru-  
ptam, antè dictum est: quæ quidem, si, *quoad diversas par-  
tes*, diversos quoque sortiatur titulos, quis absurdum sta-  
tuat? Cum enim ipse Christus illam agro dicat esse simi-  
lem, *Math. XIII.* quæ præter bonos h. e. filios regni, v. 38.  
& justos, v. 49. non sanctos quoque intra se, h. e. filios  
illius nequam sive Diaboli, malosque habeat, quis eam  
secundum se *totam* Christi sponsam, fidelium matrem, di-  
xerit? quin potius secundum eam partem, quæ bonis, san-  
ctis & regni filiis constat, illustres ejusmodi obtinet titu-  
los: secundum alteram verò, quâ malos quoque & Dia-  
boli filios admixtos habet, adulteræ nomen non poterit  
declinare. Conferri de hac Assertione omnino mere-  
tur *B. Samsonii Nostri Anti-Jesuita Primus*, ubi *Q. II.* de  
facie Ecclesiæ ante *B. Lutherum*, p. 13. & *Q. III.* de *Testibus E-  
vangelicæ Veritatis*, p. 113, & *Q. IV.* de *Majorum nostrorum*  
salute, p. 132, fusiùs agitur. Satis inde patet, neque Deo, an-  
te *B. Lutheri* tempora, Ecclesiam, neque Ecclesiæ verita-  
tem, neque Veritati, diversis locis, adstipulatores aut  
Confessores defuisse.

### ASSERTIO III.

*Reformatio memorabili conatu Rigæ suscepta, felicissimo successu continuata fuit.*

### EXPLICATIO.

I. Divinâ procul dubio clementiâ tantum opus pro-  
movente, ANDREAS KNOPIUS Evangelicam doctri-  
nam primùm *Rigæ* publicè & purè proposuit. Inde est,  
quod non tantum *εξαρχος Reformationis in Livonia*;  
sed *Rigæ* etiam *Apostolus à Viris doctis* appelletur. Quæ  
autem fuit (1.) conatus istius occasio? quantum ex *B. Chy-  
trai*

træ Saxonia videre licet, Treptoæ Pomeranorum, ex B.  
Lutheri de Captivitate Babylonica libro, prima purioris  
doctrinæ contra Papatum capita percepit. Veniebat  
liber ille, exeunte Anno MDXX. in manus Johannis Bugen-  
bagii & Andreae Knopii, qui singulari fide & dexteritate  
scholam ibi regebant: excitabantur statim novi libri le-  
ctione animi, sicut fusiūs proponit *Historicus*, pag. 252.  
edit. Anno 1611. in fol. ut non tantum ipsi usitatas su-  
perstitiones & traditiones hominum; sed & alii magis  
magisque fastidirent. Atrox inde nonnullorum impe-  
tu, in Doctores veritatis, ab Episcopo Camminensi mota est  
persecutio: aliis ergo in vincula conjectis, *Rugenhaus*  
quoque & *Knopius* fugâ sibi consulere, & alter *Vittebergam*, alter *Rigam* abire properarunt. Notum verò tan-  
ti viri nomen antea quoque Rigæ erat. Fratrein  
habebat hic Canonicum, *Jacobum Knopium*: aliquot etiam  
Rigenses optatissimâ illius in Pomerania informatione  
usi erant. Quod ergo multis jam ex Senatorio, pluri-  
bus ex civium ordine de Reformatione, B. Lutheri stu-  
dio, *Witteberga* suscepta, partim ex literis, partim famâ  
innotuerat, omnes ex Andreae Knopii ore, & solidius quidem,  
poterant percipere. Neque defuit ipsorum desi-  
derio Vir multiplici donorum apparatu, & non minus  
ad piam conversationem, quam ad solidam informa-  
tionem instructissimus, compositis quoque sacris *Cantio-  
nibus*, spiritu & vitâ plenis, paratisimos ad verbum Dei  
purius audiendum animos devinciens! Sed quid (2.)  
de ipsa Reformatione factum? Vocatus est ad publicè do-  
cendi officium ab Ecclesia *Knopius*: audire ipsum cupie-  
bant è suggestu, ideoque Anno MDCXXII. d. 23. Octobr. in  
Petrino Templo, primam Concionem habuit. Secutæ  
statim

statim sunt aliæ, magnam partem, ut illa ferebant tem-  
pora, quotidiana, quibus graviter, ex Verbo Dei, in fædas  
Monachorum nundinationes, in multiplicem idoloma-  
niā, in sacrificiorum Pontificiorū mores, quos jam  
dudum Rigæ detestabantur, inventus, doctrinam de *Justifi-  
catione* nostra coram Deo, juxta informationem Aposto-  
licam, præprimis inculcavit. Neque satis ipsi erat, ve-  
ritatem è suggestu aperire auditoribus; asserere etiam  
adversus Monachos publicè voluit, habitâ cum illis, in Pe-  
trini Chori aditu, *Disputatione*, quæ ut sine strepitu aut  
tumultu prosperè succederet, magnâ omnium bonorum  
curâ provisum; latus autem *Knopio à Consule*, *Conrado  
Dierkopfio*, munitum fuit.

II. Quid ergo reprehensione dignum adversarii in  
Reformatore inveniunt? quid in *Rigenibus*? Quodenim  
(1.) *Knopium* concernit, persecutionem fugiens, Rigam  
abiit: ecquis hoc ipsi vertat vitio? *Donis* veritatem Ev-  
angelicam docendi à Spiritu Sancto exornatus, & ab  
Ecclesia ad sacrum Ministerium *vocatus*, spartam, quam  
nactus erat, decorare conatus est: nulla hīc temeritas! ne-  
que alienam à Scriptura Sacra, aut novam doctrinam  
protulit: sua fecit B. Lutheri verba: *Wir haben (auch zu Riga)*  
*diese Predigt nicht neu gemacht / sondern eben dieselbe alte be-  
stätigte Lehre der Aposteln wieder herfür bracht / wie wir auch*  
*keine neue Taufe / Sacrament / Vater unser / Glauben*  
*gemacht / ja nichts neues in der Christenheit wissen / noch haben*  
*wollen / sondern allein ob dem alten (so Christus und die Apo-  
steln hinter sich gelassen / und uns gegeben) streiten und halten.*  
Aber das haben wir gethan / da wir solches alles gefunden /  
durch den Bapst mit seiner Menschen Lehre/ verdunkelt/ ja mit  
dickem Staube und Spinnweben und allerley Unziesfers  
C Geschmeiß

Geschmeiß behängt/ dazu in Ketten geworffen und verfreten/ haben wir es/ durch Gottes Gnade/ wieder herfür gezogen/ von solchem Geschmeiß gereinigt/ den Staub abgewischt/ gesegnet/ und ans Licht bracht/ daß es wieder rein glänzet/ und jederman sehen kan/ was das Evangelium/ Taufe/Sacrament/ Schlüssel/ Gebet/ und alles sey/ was uns Christus gegeben hat/ und wie man des seliglich brauchē sol. Ita B. Luth. Ita B. Knopius cum ipso, T. VII. Jen. f. 19. Factum autem tempestate illâ (2.) à Rigenibus expendere, non est nostri propositi: extat hodie typis expressa Senatus Rigensis responsio, (verba Chyrae refero, pag. 257.) opposita falsae Monachorum relationi, ad Cæsaris locum tenentes, quā suæ fidei sum. mam & discessus Monachorum rationem exponunt. Quid? quod Senatus etiam Archi-Episcopum Rigensem, Casparum, subjectissimè rogavit, (verba sunt ejusdem Historici, pag. 256.) ut propter Dei gloriam, & tot animarum salutem, & instantem necessitatem, pios & sinceros verbi divini Doctores Ecclesiis in urbe præficiat, ne, si officio suo Archiepiscopus desit, Civitas ipsa imminenti malo medicinam necessariam adhibere cogatur. Cum autem hæ preces, aliquoties repetitæ, cum risu & ludibrio in aula exciperentur, communi Civitatis consensu & approbatione sinceri Doctores per Magistratum vocati sunt. Bonum pius factum! Neque aliter de eo judicare posset celebratissimus nostro tempore religionis Pontificia assertor, Valerianus Magnus, Capucinus, cuius verba, observata sanè dignissima, quæ in Pref. ad Biblistas, quam Judicio de Acaholicorum Regula Credendi, An. MDCXL, denuò auctiussq; edito proposuit, huc referre, quis prohibeat? ita autem habent. Fateor, Biblistæ, fuisse, sub finem superioris seculi, cur homo, amans boni publici ac

ci ac prudens, voluisse reformari apud nos pleraque, salvâ Fidei integritate, nusquam deformatâ. (Sed quis credere posset, in tanta Ecclesia corruptione, quanta iam describetur, salvam fidei integritatem fuisse?) Fuerat eâ tempestate Catechismus Christianæ plebi rarus: Ignorantia frequentior: Mores in populo corrupti, usque ad orbis scandalum. Insederat animis, ex inscitia illa, frequens superstitionis in cultu sanctorum: In Veneratione sacrarum imaginum; in devotione erga Sanctorum Reliquias. Invaserant plerosque Ecclesiasticorum Ambitio, Simonia, Pompæ, Delitiæ: Quæstus etiam ex Jurisdictione Ecclesiastica gravis populo Christiano. Ipsæ Indulgentiæ à privatis Ecclesiasticis sæpius trahi videbantur in nundinas. O mores! ô tempora! Sed ô iram Divini Numinis! Defuit, qui expostularet opportunam Reformationem! Ita illæ. Quod ergo, ut hæc pauca his subjiciamus, illo tempore, propter corruptissimum Ecclesiæ statum, amore boni publici, quod prudenter, quod piè, quod stimulante conscientiâ, quod ex devotione Christiana, quod ad avertendam Numinis divini iram, quod opportunè à Rigenibus factum est, quis bonum factum esse negare ausit?

III. Cum autem tanto operi tractando non sufficeret unus Knopius, fidum ei, illo ipso anno M D XXII parastatem Deus adjunxit, Sylvestrum Tegetmeier, qui, vocatus quoque ad docendum verbum Dei, quod Rostochii quoque fecerat, habitâ Domin, i. Adv. in Jacobeo Templo concione, cum Knopio, totus in eo fuit, ut opus Domini strenuè perageretur. Hinc felicissimus, per Dei gratiam, successus (1.) in hac civitate: utriusque studium eò fuit adhibitum, ut, juxta informationem Ecclesiasticam, juventus quoq; fundamenta pietatis & Catechismi

utiliter addisceret, operam conferente Joachimo Mollero, quem comitem è Pomerania Knopius habuerat. Hinc felicissimus successus (2) extra Civitatem, ubi quidem, Knopio constanter Rigæ laborante, Collegæ Tegetmeieri opera præcipuè emicuit. Liceat hic de duabus tantum expeditionibus nonnulla, quæ ex B. Viri MS. notata nobis suppetunt, referre. Prima est, quod, cum Senatus Dorpatensis, missô Rigam Secretariò, Joachimo Sassen / Anno MD XXV. circa Festum Purif. Virum peteret, qui Ecclesiam de nonnihil cognita jam doctrinæ Evangelicæ puritate informaret amplius, Tegetmeierus eò profectus est, Septimanas quatuor, juxta Conciones quotidie habitas, latinâ etiam Prophetæ Malachiæ explicatione consumens, ut inde cupida veritatis Ecclesia magna incrementa caperet. Paulo post domum reversus Tegetmeierus, cum Civitatis nostræ Deputatis, VVolmariam, ad Comitia publica abiit, & gratiose, plus semel repetito Magistri Ordinis, VVolteri à Plettenberg, indultu, frequentes Conciones, in magna Nobilitatis frequentia, frustra obnitentibus & captivationem Tegetmeieri expetentibus Episcopis, in Templo etiam habuit; sed cum præsentissimo vitæ periculo, quod Fratres Dominicani, cum Episcopalibus, clam, palam struebant, per divinam tamen providentiam, & singularem Ordinis Magistri curam, superato. Verè igitur, cum per Livoniam, quaqua versus eò tempore porrigebatur, tam feliciter succederet institutum laudissimum, dici poterat de Duumviris istis: KNOPIUS plantavit: TEGETMEIERUS rigavit: DEUS, ad Ecclesiasticam Reformationem, dedit incrementum!

ASSER-

#### ASSERTIO IV.

Reformatam igitur Ecclesiam nostram non minus, quam Apostolicam, Evangelicam, Catholicam, Lutheranam aut Augustanæ Confessionis nominari posse afferimus.

#### EXPLICATIO.

I. Agitur de nominibus Ecclesiae discretivis, & in primis de primo: ubi not. (1.) utrum eò uti nobis liceat? Non affectamus sanè nomen Reformatorum, multò minus nobis, & quidem solis vindicamus: faciunt hoc Calvini sectatores, quibus nullum placet aliud, quod ipsis, licet commodissimè, ab aliis tribuitur; nullum tamen competit minus, quod probârunt alii. Quam verò habent causam? Duces suos & Doctores primos, quos scilicet B. Lutherò nostro, in augusto Reformationis opere, surrogatos credunt, ut ab eo intermissa studiosius expenderent, h. e. primi illius, in Ecclesia superiori seculò, Reformatoris reformatores essent. Ubi autem testimoniales tabulæ? ubi causæ solidæ, quibus institutum istud roborent? Licet parum, apud nos quidem, referat, cum in cœtibus Ecclesiasticis Calvini sectatores notandi veniunt, num Reformati dicantur, an Calviniani? modò ita exprimantur, ut errores ipsorum evitari possint. Notamus potius (2.) utrum nomen hoc, vel monetae hujus discretiva alia, sive à Doctoribus, sive à Dogmatibus petantur, adhibere, vel admittere saltem, expediat? Optandum quidem esset, omnia cum Deo in Ecclesia esse unum, unam fidem, unum nomen, nomen Christi, ut dicamur & revera simus Christiani: hoc nomen sacræ proponunt literæ, neque aliud primitiva usurpavit sibi Ecclesia, neque nos de alio essemus soliti. Cum autem variae Denominationes, non repugnante

pugnante Dei verbo, usu jam receptæ sint, neq; nos illas planè aversamur; sed ut *distinguamus* tamen a. inter denominationem *temerariam*, sive schismaticam, in quam Apostolus *I. Cor. I, 12, 13. c. III, 4*, invehitur, & quodammodo *necessariam*, sive discretivam, ut ita heterodoxi ab orthodoxis secernantur. Et hanc Spiritus S. nusquam reprehendit, modò distinguamus b. inter *denominationem ipsam*, quæ admitti potest, & *rationem ejus suppositam*, quasi vel in nomen alicujus hominis, à quo nomen ferimus, baptizati simus, vel singulari cultu ipsum venemur, quam omnes nostri constanter rejiciunt.

II. *Quinq;* autem appellationes Ecclesiæ nostræ atculimus: vocatur (1.) *Evangelica*, & rectè quidem, cum eō nomine doctrinæ nostræ ratio utiliter manifestetur. Speciosi sunt pedes *evangelizantium*, speciosum hoc nomen est: neque externâ tantùm ejus specie palliamus Confessionem nostram; calumnia hæc adversariorum est; sed ex Scriptura sacra orthodoxiam nostram, quod *fidei* veram & sincerum *cultum* spectat, demonstramus. Sed num (2.) *Catholica* quoque dici potest nostra Ecclesia? dici potest: imò, si hoc nomen de *exacta fidei* & *doctrine* cum verbo *Dei conformitate*, omnibusque omnium ætatum Christianis *absolutè* intelligatur, cui demùm, nisi nostræ, competit Ecclesiæ? Aliás jure etiam divino nec spoliare nostram Ecclesiam hoc titulo, nec possessionem ejus Adversariis licet tradere, quod fusiùs à B. *Hülfeman*, cap. XVII. th. 23. *Brev. Ext.* diductum legi poterit. Nos (3.) ad B. *Lutheri* nomen pergimus, laudi quoque nobis ducentes, quod Ecclesia nostra *Lutherana* inde nominatur. Notent in nobis *Pontificii* nomen hoc, quomodounque velint, ceu *hæreticum* & *schismaticum*: vellicent etiam *Calviniani*, ut impium, cum, appellare se

Luthe-

Lutheranum, honorem Christi magis lædat, quam Paulinum aut Petrinum, judge *Parao*, p. 62. Com. ad verba Apostoli, *I. Cor. I, 2.* faciunt hoc invitâ veritate. Expendamus modò a. appellationis hujus originem: à Pontificiis est, qui, cum errores suos à B. *Luther* notatos agnoscere nollent, Ecclesias ipsi adstipulantes Lutheranas appellârunt, non honoris quidem gratiâ; sedut ipsis velut notam schismatis hærefoeosque objicerent. Expendamus b. Ecclesiæ nostræ intentionem, cum imponi sibi nomen isthuc passa est, discriminis nempe causâ, non quod autoritatem B. *Lutheri* fidei suæ substernat: ingenuam enim hanc servitutem *soli Deo* & verbo ejus debemus omnes; sed ut præstiti ab ipso, in Reformationis opere, *ministerii* gratiâ recordetur animô. Neque caret hoc veterum Christianorum exemplö, qui, *Athanasi* partes contra *Arianos* secuti, *Athanasi* haud inviti dicebantur. Audiatur de hoc nomine B. *Lutherus* ipse, *Tom. II. Jen. Germ. Part. 2. p. 92.* a. & occurrenti forsitan ex Tomo eodem, p. 62. b. dubio satisfaciet. Quod autem (4.) Ecclesia nostra *Invariata Augustana Confessionis* nomen obtinet, exinde factum est, quia Symbolum hoc Ecclesiarum quarundam Evangelicarum in Germania, ab illo usq; tempore, constanter sequitur, quo, velut *Imperii Romani Civitas*, in societatem earundem est recepta. Patent hæc ex *Reipubl. Nostræ Archivis*, quæ quidem in præsenti allegare nihil attinet. Breviter notamus (5.) nomen, quod Ecclesia Lutherana *Reformata* dici posit. Ita nostriante multos annos ipsam, & se ipsos *Reformatos* appellârunt: potiori quidem jure, quàm *Calviniani*, qui sibi solis titulum hunc volunt tribui. Conferatur ex *Libro Concordiae* p. 628, 629, 631, 633. ubi ratio invenietur hujus nominis,

quod

quod nimis Electores, Principes & Ordines Imperii, sinceram Evangelii doctrinam amplexi, Ecclesias suas ad verbi divini normam piè reformârint. Hoc igitur cum nostra quoq; Rig<sup>e</sup> fecerit, eodem certè nomine gaudere potest.

III. Quicquid tamen sit de discretivis illis titulis Ecclesiæ; de notis verè & piè reformatæ aliquid adjungere in primis necessarium videtur esse: hinc enim de Rigen<sup>s</sup> quoq; judicari poterit. Notamus autem (1.) nobis hîc de Ecclesia particulari sermonem esse, unde ipsa verè reformata dici queat, & quidem in florenti statu. Quod si enim, Dei permisso, accidat, ut persecutionum & hæreseon fluctibus oppressa, nullum habeat Religionis exercitium publicum, nullum fidei publicè proponendæ medium, quas, quæso, ejusmodi latentes, adeoque invisibiles Christiani, externas notas habere, aut manifestari inde possunt? Quod verò universalem spectat Ecclesiam, qvia ex particularium aggregatione constat, nonnisi earundem notis innotescere poterit. Not. (2.) nos hîc non litigare de notis his vel istis communibus: signa enim duntaxat sunt & accidentia ejusmodi, quæ facilè possunt fallere: proprias requirimus, puram scilicet doctrinæ cœlestis prædicationem, cum legitima Sacramentorum administratione: hæc certè illi firmiter includitur: ubi enim doctrina cœlestis pure prædicatur, ibi non potest non Sacramentorum etiam legitima esse administratio. Hæc duo sunt organa, quibus alitur Ecclesia & conservatur, I. Cor. IV. 15, I. Pet. I. 23. Hæ sunt tum verorum Christianorum, tum Doctorum inter illos notæ, Job. VIII. 31. cap. X. 27. quidni etiam totius veræ Ecclesiæ, quæ illorum congregatio est? I. Cor. I. 2. Hæ ostendunt quoque talem Ecclesiam:

hæ

hæ à falsa eam discernunt, semperque ei, certâ ratione, foli, & omni convenient, unde notas veri nominis cognosci, aliunde supponitur. Not. (3.) quibusnam notæ illæ promtum præbeant indicium? Non paganis sanè & infidelibus, quibus Spiritus Sancti impulsu revelata Scriptura vel nullò modō, vel aliquò tantum sacrosancta est, ut qualemcumq; notitiam exinde capiant; sed fidelibus & Christianis, qui, cum Scripturam Sacram infallibile Dei Verbum esse, nulli dubitent, de hac vel illa particulari Ecclesia: num vera sit & incorrupta? sunt solici. Neque illud sine gravi causa! diversæ enim sunt in Christiano orbe Ecclesiæ, quarum una cum altera communionem habere recusat, quælibet sibi veritatis atq; puritatis laudem vindicat, suamq; religionem acriter propugnat. Quis cuiquam salutis suæ non prodigo, vitio verterit, in genuinas notas inquirere, ex quibus: quænam vera sit & incorrupta, in qua firmâ conscientiâ subsistere, & æternam salutem, juxta mediorum divinitus adhibitorum ordinem, sine animæ, in prosperis & asperis, periculo, sine seductionis metu adipisci possit? solidè addiscat.

IV. Rectè quidem ista fiunt, inquies; modò notæ ejusmodi sint necessariæ, nec illis indagandis frustra laboretur. Omnipotens sunt ex antè dictis necessariæ. Hallucinantur enim graviter, qui necessitatem aliquam non modò negant penitus; sed propemodum inutilem, in inquirenda vera Ecclesia, operam consumi statuunt. Num verò (1.) inutilis opera est corpori Christi mystico, civibus regni cœlorum, domesticis Dei, ovi bus Christi, matris spirituali, communioni sanctorum, cui bona spiritualia ordinariè dispensanda, cum promissione gratiosæ præsentia, Salvator benignissimus concredidit, externâ quoq; aggre-

D

aggregatione associari? Hoc quidem dixerint profana illius  
sententiae lectatores, existimantes, quemlibet cuiuslibet Ec-  
clesiae se adjungere, in quaenque Religione, sine animae  
incommmodo, versari posse. Pessimè dictum! quod tamen  
aureo Prophetæ dicto: *Justus suæ fidei vivet, Hab. II, 4.* in-  
crustare non verentur. Quid autem verba hæc ad Li-  
bertinos? agunt quidem de fide; sed vera, & quidem sub-  
jectiva & salvifica, meritum Christi apprehendente, quæ  
ereditur, & tantam ejus necessitatem inculcant, ut,  
sicut nemo aliena vitæ vivere: ita nemo etiam alterius lo-  
co credere possit. Nobis in præsenti de vera fidei doctri-  
na, h. e. de fide objectiva & dogmatica, quæ creditur, ser-  
mo est, ad quam *Ezaias, cap. VIII, 20.* respicit: ad legem,  
dicens, & ad testimonium, sive doctrinam de divina vo-  
luntate testantem; quod si non dixerint secundum ver-  
bum hoc, non erit eis lux matutina, non gaudebunt  
Dei gratia, quæ vivum animæ solatium & pacem Spir. S.  
elargitur. Ubi autem hæc lux ex voto nobis obtingit, nisi in  
vera & incorrupta Christi Ecclesia? qualem quidem, jux-  
ta reliquias, per totam Livoniæ, RIGENSEM nostram esse,  
imò à Reformationis usq. tempore fuisse, gratâ mente celebra-  
mus. Non regnat hic vel *pleonastica* Pontificiorum, vel  
*elliptica* Reformatorum Religio: Sic enim non abs re al-  
tera distingui potest ab altera, in primis à Nostra. Quid  
enim *Pontificia?* in plerisque fidei articulis strenue adhi-  
bet *multiplicationem*, ut, cumulatis fidei principiis, à Deo  
proposita salutis media, tot humanarum traditionum  
additione augeantur. Quid Religio Reformatorum? non  
minori studio in adhibenda subtractione occupata est, al-  
latō in proscenium Ecclesiæ *Absolutum* Dei de salvandis re-  
probansque hominibus decretō, ut *principia* veritatis Ev-  
angelicæ

angelicæ dogmata, de universali Dei gratia, de universali  
Christi merito, de universali Spir. S. vocatione, de efficacia  
Verbi & Sacramentorum, de Dei-Hominis apud nos  
præsentia & alia subtrahendo pervertat, pervertēdo sub-  
trahat, qvod alibi ostenditur. Nos (2.) infallibile Dei man-  
datum in Ecclesia nostra secuti, non minus subtractionem,  
quam additionem ejusmodi fugimus. Ita enim ille,  
*Deut. IV, 2.* Non addetis ad verbum, quod loquor vobis,  
neque quicquam diminuetis ex eo. Et hunc divinum  
Canonem, cum universæ Scriptura Sacra Canone, quanta  
cum obtestatione obsignet D. *Johannes*, non sine pii ani-  
mi horrore, *Apoc. XXII, 18, 19.* expendi meretur. Quod  
igitur Apostolus Timotheo suo, *II. Epist. III, 14, seq.* seriò  
inculcavit, sibi quoque dictum nostra novit Ecclesia, &  
sicut *manet in iis*, quæ ex Scriptura Sacra didicit, à Deo  
concredita: ita studiosè curati, piam Juventutis, à teneris  
usque in Sacris informationem, ut pusilli etiam reddantur  
sapientes ad salutem, per fidem in Jesu Christo. Ita  
curat 2. solidam adultiorum confirmationem, propositis,  
quæ ad doctrinam, ad redargutionem, ad correctionem,  
ad disciplinam in justitia sunt utilia. Nec enim potest  
aliter, cum non una omnium in ea viventium sit con-  
ditio. Sunt, qui *laborant defectu notitiae* eorum, quæ  
sive facti, sive crediti sunt necessaria: his informatio-  
nem & doctrinam suggerit: sunt, qui *erroribus*, hinc in-  
de obrepentibus, clam palam seduci possunt: his soli-  
dam correctionem atque refutationem deberi intelligit:  
sunt peccatores *securi & præfracti*: circa tales allaborat  
providè, ut, à peccatorum somno revocati, ad meliorem  
mentem revertantur, & novos pietatis studio pro-  
gressus faciant: sunt demum *afflicti, infirmi, tentati*; quid-  
ni so

nī solatiō erigere laboret eos *Mater optima?* Nullō quidem aliō fine, quam ut *3. ad omne opus bonum perfecta obtineatur instructio*: ad hunc enim finem, qui *mensura mediorum est*, propositae doctrinæ salutaris partes ita sunt necessariæ, ut, si tollatur aliqua, aut depravetur, neque *fides vera*, neque *vita sincera* sarta tecta maneant. Ita hodie Ecclesia Rigensis, in Scholis atq. Templis, suos docet ac dicit: inde status ejus meritò dignoscitur. Licet enim: quinam, in promiscuo hominum cœtu, veræ fidei & sanctitatis laudem obtineant? distinctè nominare nequeamus: *DEUS novit*, qui sunt sui, *II. Tim. II, 19.* ex pura tamen, circa modō memorata, Verbi prædicatione, & legitima Sacramentorum administratione, manifesta sat is est illius conditio. Dubitantibus autem hīc nihil amplius reponemus, quam illud Salvatoris nostri,

*Joh. I, 40. Venite & videte!* ut veram, pièque  
Reformatam Ecclesiam Rigensem  
animadvertant.

SOLI DEO GLORIA.

